

Հ Ե Ղ Ի Ն Է

Վ. Է Պ

Ց-ին Մ. ՄԱՐԻՍԵԱՆԻ

1

Մի փոքրիկ, բայց գեղեցիկ պարտիզում ընկուզենիների տակ նստած էր տաննեօթ-տասնութ տարեկան ջահէլ աղջիկ և ձեռքումը տրորում էր վարդի ծաղիկներ:

Նորանից մի քանի քալ հեռու ծառին կռթնած կանգնած էր մի քսանմէկ տարեկան երիտասարդ: Թէև օրը շոք էր, բայց նոր ջրած դալարը, բացւած վարդերն ու մարգերի միջով հոսող առուն ամբողջ պարտէզի մէջ ակնորժելի զովութիւն ու բուրմունք էին սփռում: 1866 թւի մայիս ամիսն էր, Կովկասում ամենաքանչելի ամիսներինց մէկը:

— Հեղինէ, հօ՛ւ էլի բան չի՞ պատահել քո և իշխանուհու մէջ, հարցրեց մոեբմաբար երիտասարդը և սկսեց անթարթ նայել իւր մօրաքրոջ աղջկայ լացակրկնած աչքերին:

— Ո՛հ, Նիկօլա, անվճռական կերպով պատասխանեց օրիորդը, բայց քեռակիւնը ինձ այն... գեներալին տալու միտքը չի թողել, սպասում է միայն, որ ես, ինչպէս նա ասում է... «խելքի գամ»:

— Իսկ այդ սպասելու միջոցին երևի քեզ անդադար նախատում է, թէ նորա բոլոր երախտիքը մոռանում ես, կծու հեգնութեամբ արտասանեց Նիկողայոսը և իսկոյն զղջաց բերնից ակամայ դուրս թռած խօսքերի համար: — Հանգիստ եղիր, Հեղինէ, այդ ամենը կանցնի, ես միայն մի բանից եմ վախենում...

—Խնդրե՛ց, մի երկարացնի, ասա:

—Որ իշխանուհու անտանելի յանդիմանութիւններից յուսահատւած յանկարծ հաւանութիւն տաս:

—Հաւատացած եղիր, որ այդ չի լինիլ, պատասխանեց Հեղինէն և սիրալիր հայեացքով նայեց մօրաքրոջ օրդուն:

—Տես, Հեղինէ, չ'ընկճես, վճռի՞ց հաստատ կաց, զգացւած արտասանեց Նիկողայոսը և բռնեց Հեղինէի ձեռքը: Ես չեմ կարող առանց համակրութեան վերաբերել ամուսնութեան՝ իբրև մի ամենալսեմ հաստատութեան, որ որոշում է մարդու և կնոջ յարաբերութիւնը՝ սիրով, բարեկամութեամբ, ընդհանուր նպատակներով ու խորհուրդներով կապւած երկու հակների ներդաշնակ միաւորութեան ձեռք: Եթէ կան աստուածային հաստատութիւններ, ամուսնութիւնը այնքան սուրբ, վսեմ ու իմաստալից հաստատութիւն է, որ ամենից շատ նա՝ սէտք է աստուածային համարւի:

Օրիորդի դէմքը աւելի և աւելի պարզւում էր:

—Առաջին անգամն եմ տեսնում, Նիկոլա, որ մի երիտասարդ այդքան յարգանքով վերաբերւի ամուսնութեան:

Երիտասարդը երկար խօսում էր այդ հարցի մասին: Հեղինէն խիստ փափագով ականջ էր դնում նորա խօսքերին, առանց մի րոպէ աչքը երեսից կտրելու: Նիկողայոսը ոչ միայն սաստիկ սիրում էր իւր մօրաքրոջ աղջկան, այլ և քաղցր պարտականութիւն էր համարում իւր համար պաշտպանել նորան: Ոչ եղբայր ունենալով, ոչ քոյր, նա մանկութիւնից սովորել էր իրան նորա հովանաւորողը համարել: Նա վախենում էր, որ մի գուցէ իշխանուհին, Հեղինէից ազատելու համար, նորան տալ առաջին պատահած մարդուն. այդ միտքը նորան շատ անհանգիստ էր անում և այդ սլափառով, օգուելով ամեն յարմար առիթից, նա խօսում էր մօրաքրոջ աղջկայ հետ այդ խնդրի մասին:

Նոքա գրաււած խօսակցութեամբ երկար զբօսնում էին պարտէզում, երբ որ յանկարծ լսեցին իշխանուհու զիւ ձայնը. կարծես սառը ջուր ածեցին նոցա գլխներին:

—Հեղինէ, ո՞րտեղ ես, շուտ արա՛, արի՛, դուռն էր իշխանուհին:

Բարձրանալով վերև իւր սենեակը Հեղինէն պատահեց իշխանուհուն, որ նորա վերայ խիստ հայեացք գցեց:

—Ի՞նչ ես գտի նման վազէ վազ անում նորա հետ, այն... Այդ նիկողայոսը իրան շատ անվայել կերպով է պահում: Գնա մաշերի ուղղի, մի քանի ժամանակ է աչքիս ուրիշ տեսակ ես երեւում, և վերջապէս աղջկան ի՞նչ սազ կը գայ Աստուծո օրը առաւօտից մինչև երեկոյ ջահէլ տղայի հետ լինել:

Հեղինէն կարմրատակեց, քիչ էր քնում մի խիստ խօսք ասէր, բայց իրան զսպեց և, տփռոհ հայեացք գցելով իշխանուհուն վերայ, յանդիմանօրէն արտասանեց.

—Քեռակին, ես չէի սպասում այդպիսի նախատինքի, մի՞թէ նա իմ եղբայրը չէ, մանկութիւնից միասին չե՞նք մեծացել:

—Գլուխս տարար դու քո հակաճառութիւններով, ամենևին ուշադրութիւն չես դարձնում տկարութեանս, խստութեամբ ընդհատեց նորա խօսքը իշխանուհին ու ձեռքերը դրեց քունքերին: Մի րոպէ անցած նա նորից սկսեց աւելի մեղմ ձայնով. աշխատիր շքեղ հագնել, այսօր մեզ մօտ հիւրեր կը լինեն: Որքան կարող ես քաղցր վարւի՛ր գէներալի հետ, նա... հասկանում ես... շատ խելօք, կրթւած մարդ է, լաւ տոհմի որդի, բարձր դիրք ունի. այդ բոլորի մասին ես քեզ հետ արդէն խօսել եմ: Յոյս ունիմ, Հեղինէ, խելքի կը գաս և չես հրաժարւիլ այդպիսի ամեն կողմից շահաւէտ ամուսնութիւնից: Պատրաստւիր, վաղը նա քեզ պաշտօնապէս առաջարկութիւն պէտք է անի, ես ու քեռիդ արդէն հաւանութիւն ենք տւել:

—Մի՞թէ՞ բարի քեռիս ուշադրութեան չ'առաւ այն բոլոր պատճառաբանութիւնները, որ ես բերի այդ ամուսնութեան դէմ: Սիրելի քեռակին, ազատեցէք ինձ այդ մարդուց, ես չեմ կարող նորան սիրել:

—Ո՞վ է քեզ ստիպում, որ այժմ սիրես նորան. կը պսակես՝ յետոյ կը սիրես: Իմ ժամանակ աղջիկները շատ անգամ մինչև նշանդրէքը չէին էլ իմանում, թէ ով է նոցա կին ուզողը, սակայն այդ չէր արգելում նրանց բախտաւոր լինել:

—Քեռակին, մի մոռացէ՛ք, որ նա ինձ աւելի հայր կը սաղի, քան ամուսին. ինչ որ ուզում էք պատրաստ եմ կատարելու...

—Դու կեանքս մուշելու ես, գոռում էր իշխանուհին զայրացած, հապա քեզ ի՞նչ մարդ է պէտք: Նա այնքան ազնիւ է, որ

մի խօսք անգամ չի ասում օժիտի մասին. այդպիսի մարդ, ճրագով որ ման գաս, չես գտնի հիմիկայ ժամանակները: Ապերախտ, ոչինչ բանի տեղ չես դնում իմ ըրողը հոգացողութիւններս քեզ համար: Օ՛Ֆ, Տէր Աստուած, ինչպէս հոգիս մաշում է այս անիրաւը:

Մի քանի րոպէ անցած իշխանուհին հիստերիկա ընկած գալարում էր անկողնում, հեկեկում էր ու տնքում: Թէև առաջին անգամը չէր, որ Հեղինէն իշխանուհուն այդ դրութեան մէջ էր տեսնում, բայց նրան այնպէս էր թւում, թէ այս անգամ հիստերիկան առաջւանից խիստ է, և նա սաստիկ վախեցաւ: Խեղճը մնացել էր կանգնած՝ անզգայ, շարած, չէր իմանում ինչ անի. ջուր էր տալիս ու օղեկօլօնով թրջում իշխանուհու քունքերը, յետոյ սկսում համբուրել նորա ձեռքերը ու ուզողով՝ գլխատակը, բայց անօգուտ: Վերջապէս, երբ որ բժիշկն եկաւ, դեղատոմս գրեց ու ասաց, որ ոչինչ առանձին բան չը կայ, խեղճ աղջիկը հանգստացաւ: Եթէ նա մի քիչ փորձած լինէր, բժշկի երկմիտ ժպիտից կը հասկանար, որ իշխանուհու հիւանդութեան անունը կապրիզ է:

Մի ժամից յետոյ իշխանուհին՝ ըստ երևոյթին՝ հանգստացել էր: ձաշին հիւրեր պէտք է գային: Հեղինէն շարած աչք էր ածում չորս կողմը ու միտք անում, թէ ինչպէս իշխանուհուն օգնի և թեթեւացնի հիւրերին ընդունելու հոգսերը:

Իսկ հիւանդը լիշելով, որ ժամի երեքին երկու նորեկ պատաւոր հիւրեր են գալու, յանկարծ՝ կարծես հրաշքով՝ կենդանութիւն ստացաւ ու սկսեց ծանր ու բարակ հագնել, զուքւել: Հեղինէն կանգնած տեղը սառած մնաց ու չէր իմանում ուրախանայ թէ զարմանայ այդ յանկարծական փոփոխութեան վերայ:

ձաշի ժամանակ իշխանը ներկայացրեց իւր քեռորդուն հիւրերից մի քանիսին:

— Տղա՛յ եմ ասել, կատարեալ զինուորական է, պէտք է գլարդիան տամ:

Նիկողայոսը ժպտաց:

— Հը, ի՞նչ ես ծիծաղում, — թանաք լպստելը աւելի լա՛ւ է, ի՞նչ, բարձրաձայն քրքիջ արձակեց իշխանը ու սկսեց սաստիկ ողբուորութեամբ, ձեռները շարժելով, պատմել վերջին պատերազմի մանրամասնութիւնները:

Յետոյ սկսեց տաք վիճաբանութիւն զանազան բարձր պաշտօններ ստացած ծառայողների մասին, այս ու այն մարդու պաշտօնական դրութեան անհաստատութեան մասին և այլն:

—Ասա ինդրեմ, Հեղինէ, միթէ՞ ձեզ մօտ միշտ այդպիսի հասարակութիւն է հաւաքուում, որ ես ահա մօտ երկու ամիս է ձեր տանը տեսնում եմ, հարցրեց Նիկողայօսը հիւրերի գնալուց յետոյ:

—Այո՛, մեզ մօտ միայն գններալներ են գալիս, երիտասարդներից համարեա ոչ ոք չի լինում մեր տանը, քեռակիներ աղմուկ չի սիրում:

—Այդ հօ՛ միենոյն է թէ մարդ կենդանի գերեզման մտնի: Դոցանից ոչ մի կենդանի խօսք, ոչ մի առողջ միտք չես լսի երբէք: Նիկողայօսը տաքացած երկար շարունակում էր այդ խօսակցութիւնը:

Վեց տարեկան ժամանակ զրկւելով մօրից՝ Հեղինէն մինչև տասներկու տարեկան հասակը ապրում էր իւր հօր մօտ, որ նորա միակ առաջնորդն ու զատիարակն էր: Հեղինէի հայրը քաղաքում ազնիւ և բարեսիրտ մարդու անուն ունէր: Զրկւելով սիրած ամուսնուց, նա իւր սիրող սրտի բոլոր զգացմունքներն ու հոգսերը ամփոփեց իւր միակ զաւակի Հեղինէի վերայ: Ծառայութիւնից մնացած բոլոր ազատ ժամերը նրան էր նւիրում՝ ժամանակ էր անցկացնում հետը, խաղում էր և, զիրկն առնելով, երկար խօսում էր հետը նրան մատչելի լեզուով: Հայրը Հեղինէին չէր ճնշում երեխայական չարութիւնների համար, թողնում էր սրտի ուզածի չափ զւարճանայ. նա միայն մի բանի էր շատ հոգս տանում, — որ Հեղինէի մէջ անարատ մնայ և չը կորչի անկեղծութիւնը: «Ամեն բան, ինչ անես, քեզ կը ներեմ, բացի ստից», յաճախ ասում էր հայրը, երբ որ նա մի որ և է աններելի չարութեան մէջ բռնւելիս աշխատում էր մի կերպով արդարանալ: Այսպիսով Հեղինէն ազատ մեծանում ու զարգանում էր և թէև քիչ բան էր սովորում, սակայն այդ քիչը նա սովորում, իւրացնում էր սիրով, հասկանալով: Բայց այդ երկար չը տևեց. տասներկու տարեկան հասակում Հեղինէն զրկւում է իւր սիրելի հօրից, մնալով բոլորովին որբ, մի ջնջին ժա-

ռանգութիւնով: Նորա քեռին, իշխան Նակունին վերցնում է նորան իւր խնամատարութեան տակ և ուզում է՝ ինչպէս հանգուցեալը իրան խնդրել էր՝ տանու կրթութիւն տալ նրան, բայց կինը, պատճառ բերելով իւր ջղերի խանգարած դրութիւնը, նորան ինստիտուտ է տալիս: Վերջը ուսումն աւարտելուց յետոյ Հեղինէն զարմանում էր տեսնելով, որ ինստիտուտում իւր հինգ տարւայ ընթացքում ձեռք բերած գիտութիւնը ոչինչ է համեմատելով այն տեղեկութիւնների հետ, որ նա խաղ ու պարով սովորել էր տանը հօրից:

Հեղինէի մանկութեան ամենամտերիմ բարեկամը նորա մօրաքրոջ որդի Նիկողայոս Վրթանէսեանն էր, որի հետ նա տեսնուում էր համարեա ամեն օր: Իսկ նորա ինստիտուտ մտնելուց յետոյ, Նիկողայոսը գնում էր մօտը համարեա ամեն կիւրակէ՝ ընդունելութեան ժամերին: Ուսումնարանական յիշողութիւններից ամենից շատ մտաբերում էր Հեղինէն այն չարաբախտ օրը, երբ Նիկողայոսը գնաց Մօսկա համալսարան մտնելու:

Ինստիտուտը աւարտելուց յետոյ Հեղինէին իշխան Նակունին վերցրեց իւր տունը: Ձընայելով որ Հեղինէն քեռու տանը երբեմն իրան միայնակ էր զգում, զուրկ ծնողական փայփայող սէրից, բայց նա դեռ ջահէլ էր. նորա զգայուն ու վառվռուն հոգին սովորեց կեանքի նոր պայմաններին, նորա սիրալիր սիրտը շուտով սիրեց քեռակնոջը, քեռուն և այն ամենքին, որոնք մօտիկ էին նրան. ամենքը նրան բարի էին թւում, չար ասած բանը գոյութիւն չ'ունէր նորա համար, մի խօսքով ամեն բան ժպտում էր նրան:

Հեղինէի քեռին, իշխան Նակունին, յիսունուհինգ տարեկան, բայց թարմ ոյժերով ու քաջառողջ գեներալ էր. Զէրքէզների դէմ վարած կռիւների շնորհիւ նա քաջ ու ազնիւ զինուորականի հռչակ էր ստացել: Նորա բարձր հասակը, լայն թիկունքը, դուրս ընկած կուրծքը, գանգրահեր գլուխը, երեսի աստիկ թխութիւնը ու խիստ աչքի ընկնող, կոպիտ դիմագծերը շատ լաւ համապատասխանում էին նորա ծաղկացրած, չափազանցրած պատմութիւններին իւր պատերազմական կեանքից, որոնցով նա շատ սիրում էր զբաղեցնել իւր հիւրերին, օգտուելով ամեն յարմար առիթից:

Իշխան Նակունին յաւակնութիւն չ'ունենալով ոչ մեծ խելք ոչ էլ բարձր կրթութիւն ունեցող կարծելու իրան, անվեհերութիւնն

ու քաջութիւնը ամեն բանից բարձր էր դասուում: Հաւատացած լինելով, որ կինը շատ խելօք ու հմուտ կերպով է վարում տան ներքին գործերը, գններալը բոլորովին նորա կամքին էր թողել երեխաների կրթութիւնը և՛ որ ասես՝ ոչ մի բանում չէր խառնուում տանու գործերին: Ձընայելով իւր ծեր հասակին, նա ոչ միայն հանգըստութիւն չէր փնտրում, այլ միշտ յուզւում էր, տրտնջում էր խաղաղութեան էրկարատեւութեան վերայ. սիրտը վտանգաւոր արկածներ էր փափագում: Տանը չէր կարողանում նստել, բացի որոշւած երեկոներից, երբ որ նոցա մօտ հիւրեր պէտք է գային:

Հեղինէն սկզբում մի քիչ վախենում էր բարկացկոտ ու դիւրագրգիռ քեռուց, բայց շուտով համոզւեց, որ նա իւր կարծածիցը աւելի բարի է: Իշխանի զայրոյթը առհասարակ շուտով անցնում էր, նա դորանից յետոյ սովորականից աւելի քաղցր էր վարւում, առնում էր գիրկը Հեղինէին կամ թէ իւր կոշտ արեւու ձեռքով փաղաքշում նորան: Իշխան Շակունու կինը, Մարիա Նիկոլաւնան կամ, ինչպէս սովորաբար անւանում էին նորան ազգականները, իշխանուհի Մայիկօն՝ խելօք և գործնական կնոջ համարումն ունէր: Ձընայելով որ քառասնուհինգ տարեկան էր, նա դեռ սիրուն էր: Եւ թէև համարեա ամենեւին կրթութիւն չէր ստացել, բայց մանկութիւնից վաճակակիրթ կուռղ շրջանում ապրած ու մեծացած լինելով, նա ձեռք էր բերել քաղաքավարական արտաքին փայլ: Չ'ուզենալով յետադէմ կին համարւել, նա երբեմն պաշտպանում էր նոր գաղափարներ, բայց իսկապէս նա երբէք չէր կարողանում հաշտւել այդ գաղափարների հետ և ատելով ատում էր երիտասարդութիւնը, որ հասարակութեան մէջ նոր գաղափարների ներկայացուցիչն է: Իշխանուհին շատ փոփոխամիտ բնաւորութիւն ունէր. երբ որ նորա կամքովն էին շարժւում, նա չափից դուրս բարի ու քաղցր էր լինում, բայց հէնց որ մի բան նորա սրտովը չէին անում, գաղազում էր և ամեն բանի վերայ փնթփնթում ու կռւում էր: Սաստիկ սիրելով հանգիստ կեանք, իշխանուհին հեռացրեց իրանից իւր երկու փոքրահասակ տղաներին, ուղարկելով նոցա Ռուսաստան ուսում առնելու: Մարդը հակառակ էր այդ բանին, բայց իշխանուհին համոզեց նորան, որ երեխաները առհասարակ ծնողներից հեռու աւելի լաւ են սովորում:

Այդպիսով ազատելով իրան ամեն տեսակ հոգսերից, իշխանուհին ամբողջ օրը զւարճութիւններով էր անցկացնում, որոնցից ամենից շատ սիրում էր բէզիկ (թղթախաղ) խաղալը։ Հասկանալի է, որ նա չէր կարող ուրախ սրտով ընդունել իւր տունը Հեղինէին և դրանով խանգարել իւր անդորրութիւնը։ Նա երկար ժամանակ դիմադրում էր իշխանի ցանկութեանը, բայց վերջապէս վախենալով հասարակաց կարծիքից ստիպւած եղաւ զիջել իշխանի խնդիրքին։

—Այդ աղջկայ պատճառով պէտք է առաջնայ անհոգ, ազատ կեանքից ձեռք քաշեմ, բայց՝ յոյս ունիմ՝ այդ երկար չի տևիլ։ Նորա պէս զեղեցիկ աղջիկները երկար չեն նստում տանը, յաճախ միտքաբուրմ էր իրան իշխանուհին։

Մի ամիս էր անցել այն օրից, երբ Հեղինէն ոտք դրեց նախնու տունը։

—Յոյս ունիմ, Մայիկօ, որ դու խեղճ որբի համար հարազատ մօր տեղը կը բռնես։

—Ձեռք ամաչում, Գէորգ, որ դեռ կասկածում էլ ես, թէ ես նորան իմ աղջկայ պէս կը սիրեմ։ Մի՞թէ ես տեղիք եմ տւել ինձ անսիրտ համարելու, նեղացած ձայնով պատասխանեց իշխանուհին։

—Խաչը, չեմ իմանում ինչպէս խօսեմ քեզ հետ։ Ինչ ասում եմ սրտիդ զիպչում է։ Իմ ասածը այդ չէր, գոռաց իշխանը, խփելով իւր ճակատին ու սկսեց մեծ քայլերով ձեմել սենեակում։ Ես իմ Աստուածը, Մայիկօ, աւելի հեշտ է թշնամուց թնդանթ խլել քան թէ կնոջը մի բան հասկացնել։ Լսիր թէ բանը ինչու՞ն է։ Հեղինէի հայրը մեռնելիս խնդրեց ինձ, որ աշխատեմ լաւ կրթութիւն տալ իւր աղջկան։ Որ միտքս է դալիս, Մայիկօ, հանգուցեալի վերջին աղերսալից հայեացքը, սիրտս ուղղում է...

—Ձեմ հասկանում թէ միտքդ ինչ է, անհամբերութեամբ ընդհատեց նորա խօսքը իշխանուհին։ Իմ կարծիքով մենք նրան առանց այն էլ աւելի ուսում ենք տւել քան թէ հարկաւոր է մի աղքատ աղջկան։

—Այդպէս մի խօսիլ, Մայիկօ։ Եթէ նա իմ աղջիկս լինէր, ես կասէի, թող կարգաւ-գրել, սրբազան պատմութիւն ու կարուձև սովորի,—քրիստոնեայ մարդու ու տնարար աղջկայ համար դրանից աւելի բան պէտք չէ։ Բայց քրոջ աղջկայ համար ես պէտք է անեմ

այն, ինչ որ իւր հարազատ հայրը կանէր՝ եթէ կենդանի լինէր. չեմ ուզում որ հոգուս մեղք լինի:

Իշխանը խորը հոգոց քաշեց ու ընկաւ բազմոցի վերայ: Իշխանուհին կարծես զգացւեց, ասաց, որ կը մոռա՞ծի այդ հարցի մասին:

—Ախր գիտեմ, որ խելօք կին ես Դու գիտես հօ՛, Մայիկօ, որ ես վախկոտներիցը չեմ, թուր ու հրացանից երեսս չեմ թեքիլ, աշխարհում ոչնչից չեմ վախենում, բայց խիղճս չի տանի անկատար թողնել մեռնող մարդու խնդիրքը:

Այդ խօսակցութիւնից մի ամիս էլ չէր անցել, որ Հեղինէի համար ֆրանսերէն ու գերմաներէն լեզուների և երաժշտութեան ուսուցիչներ վարձեցին: Հայերէնի մասին ամենեւին խօսք էլ չ'եղաւ, որովհետեւ թէ իշխանը թէ իշխանուհին, որոնք շատ վատ էին խօսում իրանց մայրենի լեզուով, երբէք մտքներովն էլ չէին անցնում, թէ անհրաժեշտ է սովորել մայրենի լեզուն: Իշխանուհին էլի կիսատ պառտ կարդալ-գրել գիտէր հայերէն, իսկ իշխանը մինչև անգամ իւր անունը ստորագրել չէր կարողանում մայրենի լեզուով: Իրար հետ մարդ ու կին միշտ ռուսերէն կամ վրացերէն էին խօսում: Հայերէնը յարգի չէր վայելակիրթ կոչւող ընտանիքներում: Այդ կողմից Վրթանէսեանի ազդեցութիւնն էլ նշանակութիւն չուներ Հեղինէի համար. Վրթանէսեանը մանկութիւնից այնպիսի պայմանների մէջ էր ապրել, որ մայրենի լեզուն իմանալը ամեն մի հայի անհրաժեշտ պարտականութիւն չէր համարում:

Հեղինէն սկսեց եռանդով պարապել ֆրանսերէն և գերմաներէն լեզուներով ու երաժշտութիւնով: Ազատ ժամերին նա կարդում էր ձեռքն ընկած գրքերը: Ոչ ոք հոգս չէր քաշում նորա համար գրքերի ընտրութիւն անելու և ոչ ոքի նա հաշիւ չէր տալիս իւր կարգացածի մասին: Ուսումնարանական ընկերուհիներից միայն Կատարինէ Արզարեանն էր նրան այցելում, բայց նա էլ շուտով հեռացաւ Թ. . .ից:

II

Հեղինէն օրէցօր աւելի և աւելի էր զգում իւր միայնակութիւնը. ոչ զինուորական քեռին, ոչ ջղային քեռակիներ, ոչ էլ գեներալների ու ազգականների հասարակութիւնը չէին կարող բաւարարութիւն տալ նորա պատանեկական անփորձ սրտի իղձերին: Օրիորդի

երևակայութիւնը միշտ զբաղւած էր իւր ստեղծած պատկերներով. նորա յուզւած միտքը յաճախ վերանում էր իրական աշխարհից. նա արդէն սկսել էր մութ կերպով գիտակցել, թէ ինչ-որ շատ կարևոր բան իրան պակասում է, թէ իւր կեանքը դատարկ, անբովանդակ է, և այդ՝ սկզբում մութ՝ գիտակցութիւնը քանի գնում աւելի և աւելի զօրանում էր: Հետզհետէ մօտենում էր այն օրը, երբ պետք է նորա տասնութ տարին լրանար և նա օր օրի վրայ սիրունանում էր. ուսումնարանի նստական կեանքից մի քիչ կռացած մէջքը շիտկւել էր, այնպէս որ մարդու խելքը գնում էր՝ նայելով նորա շնորհալի բարձր հասակին. նուրբ իրանը լցւել, զարգացել էր. գեղեցիկ սև աչք-յօնքն ու մազերը աւելի ևս գեղեցիկ էին երևում նորա սպիտակ ու կարմրայտ, երկարուկ երեսի վրայ: Բայց Հեղինէի գեղեցիկ դէմքում ամենադուրեկանը նորա գրաւիչ ժպիտն ու խոր, ծով աչքերի վերին աստիճանի քաղցր հայեացքն էր, որոնք կարծես անշնամարելի էին դարձնում նորա թէև կանոնաւոր, բայց փոքր ինչ խիստ գիմագծերը:

Իշխանը քանի անգամ է, որ հասկացնում էր կնոջը, թէ Հեղինէի համար պետք է երիտասարդ ծանօթներ գտնել. իշխանուհին՝ ըստ երևութին՝ համաձայն էր նրան, բայց երկուսն էլ, մէկը անհոգութիւնից, իսկ միւսը չափազանց զբաղւած լինելով իւր անձնական խնդիրներով, ցանկութիւն յայտնելուց հեռու չէին գնում:

Մի օր, երբ Հեղինէն սովորականից աւելի էր զգում իւր միայնակութիւնը, նամակ բերեցին փօստից. նամակը Կատարինէիցն էր. նա հաղորդում էր Հեղինէին, թէ ինքը պսակւել է մի Գէորգ Սահառունի անունով շատ արժանաւոր երիտասարդի հետ և յափշտակութեամբ նկարագրում էր, թէ ինչպէս են միասին ապրում: Հեղինէն երևակայութեամբ տեղափոխւեց Կատարինէի մօտ, առժամանակ մոռացաւ իւր դարդը, ուրախանալով ընկերուհու բախտաւորութեան վերայ:

Նոյն երեկոյ մի ուրիշ նշանաւոր դէպք էլ պատահեց: Նրանց մօտ հիւր եկաւ Հեղինէի մօրաքրոջ որդին ու մանկութեան ընկերը՝ Նիկողայոս Վրթանէսեանը, որ օգուտ քաղելով քեռու հրաւերից, վճռել էր նոցա մօտ մի քանի ժամանակ մնալ. այդտեղ նա կարող էր մի քիչ կազդուրել իւր խախտւած առողջութիւնը:

Վրթանէսեանը միջահասակ մի երիտասարդ էր, չափազանց լիար ու գունատ: Նորա անկանոն դիմագծերը ոչնչով աչքի չէին ընկնում, բայց երբ նա ոգււորած խօսում էր, նորա աչքերի փայլը այն աստիճան խելք ու եռանդ էր արտայայտում և ամբողջ գէմքը այնքան աղնիւ արտայայտութիւն էր ստանում, որ այդ ժամանակ նորան կարելի էր համարեա գեղեցիկ տղամարդ անւանել: Մեծ խելքի ու ընդունակութիւնների տէր լինելով, բայց տոկուն աշխատութեան հակումն չ'ունենալով, Վրթանէսեանը չէր կարողանում որ և է գործի բոլորովին անձնատուր լինել, կենդրոնացնել մի բանի վերայ բոլոր իւր ոյժերն ու ջանքերը: Դեռ փոքր հասակում, գիմնագիւյցում, նա իրան յատուկ յափշտակութեամբ գրաւում էր մէկ այս մէկ այն մասնագիտութիւնով: Համալսարան մտնելով նա այն աստիճան յափշտակեց հասարակական հարցերով, որ բաւարարութիւն չէր կարողանում գտնել չոր ու ցամաք գիտութիւնների ուսումնասիրութեան մէջ. մի բաժանմունքից միւս բաժանմունքն էր փոխւում, չը կարողանալով կանգ առնել մի որ և է մասնագիտութեան վերայ:

Հեղինէն շուտով հասկացաւ, որ Նիկողայոսը նման չէ այն մարդկանց, որոնց նա ամեն օր տեսնում է. նա նրանում մի այնպիսի բան նկատեց, որ կարող էր իւր սրտի խորքը թափանցել: Եւ իրաւ, Նիկողայոսը միակ մարդն էր, որ Հեղինէի հօր մահից յետոյ կարող էր նորա վերայ բարերար ազդեցութիւն գործել: Մի յարկի տակ կենալով նա ու Հեղինէն համարեա ամբողջ օրը միասին էին լինում. նա կարդում էր մօրաքրոջ աղջկայ համար իւր հետ բերած գրքերից, խօսում էր հետը և զարմանալով նկատում էր, որ նա օրէցօր փոխում է իւր կարծիքները, աւելի և աւելի իւրացնելով իւր համար բոլորովին նոր հայեացքներ: Առաջին գլխում նկարագրած խօսակցութիւնից յետոյ մի ամիս էր անցել: Վրթանէսեանը երկար փնտրում էր Հեղինէին. ամբողջ տունը ման եկաւ,— չը կայ, վերջապէս նորան գտաւ պարտէզում: Հեղինէի ձեռին ինչ-որ գրոտած թերթեր կային:

— Կարծեմ, ինչ որ գրում էիր. կարելի՞ է տեսնել:

— Ե՛, չիմար բան է, ժամանակդ ափսոս է,— ասաց Հեղինէն կարմրելով և չէր ուզում ցոյց տալ: Խնտիւտուտից սկսած ևս սո-

վորութիւն եմ դարձրել թղթի անցնել այն բոլորը, ինչ որ մտքովս ու սրտովս անցնում է միայնակութեան մէջ: Բացի թղթից ոչ ոք չ'ունիմ, որին կարողանայի հաղորդել իմ տպաւորութիւնները:

— Մի՛թէ ինձ բարեկամ չես համարում, համարեա լանդիմանօրէն հարցրեց Նիկողայօսը:

— Բայց դու շուտով գնալու ես, ես էլի մէնակ պէտք է մնամ: Վերջին խօսքերն արտասանելիս Հեղինէի սիրտը տխրեց, բայց Նիկողայօսի համար դժւար չէր փարատել նորա վիշտը: Նա պերճախօս էր: Հեղինէն մեծ հաճոյքով էր ականջ դնում նորա խօսքերին:

— Այ, այդպէս, երեսերք, ծիծաղէք ուրախացէք, այդ իմ հաւատիս մօտ է, ուրախ ձայնով արտասանեց Նակունին, պատահելով նրանց պարտէզում ձեմելիս: Նիկօն շատ է լցւել ու լաւացել, չէ՛, Հեղիկ: Մի՛տդ է ինչքան ղեղնած ու լղար էր, երբ որ Ռուսաստանից եկաւ:

— Հա, քեռի, բայց ի՞նչ, քանի որ էլի կարող է հիւանդանալ, սրտացաւութեամբ պատասխանեց Հեղինէն: Բժիշկն ասաց, որ Մօսկւայի օդը շատ վատ է Նիկողայօսի թոյլ կուրծքի համար:

— Ոչինչ. ես բոլորովին կազդուրւել եմ, այնպէս որ մէկ-երկու ամսից յետոյ աներկիւղ կարող եմ գնալ...

— Չէ՛, ինչ ուզում ես ասա, Նիկօ, ես քեզ էլ Ռուսաստան թողնողը չեմ, — խստութեամբ կարեց նորա խօսքը քեռին: Ո՞ւմ պատանքն էին հերու պատրաստել, հը՛, մոռացել ես, հա՛: Իսկ եթէ անպատճառ ուզում ես շարունակել ուսումդ, դնա արտասահման:

Նիկողայօսը կմկմաց, չը կարողացաւ մի վճռական բան ասել: Գիտին հասկացաւ պատճառը:

— Գիտեմ, որ միջոցներդ չեն ներում արտասահման գնալու, բայց քանի ես ողջ եմ, ոչ դու, ոչ էլ Հեղինէն ոչ մի բանում կարօտութիւն չէք բաշիլ:

Վրթանէսեանն ու Հեղինէն սիրով ու երախտագիտական զգացմունքով սեղմեցին իրանց քեռու ձեռքը և երեքով պարտէզից տուն գնացին: Իշխանուհին նստած բէզիկ էր խաղում:

— Գէորգ, նստի՛ր, իմ տեղը խաղա՛, ես այս րոպէին կը դամ, — դիմեց նա ամուսնուն, և Հեղինէի ձեռքը բռնեց ու հետը հիւրասենեակից դուրս եկաւ:

—Այսօր մեզ մօտ ճաշելու է քո հին ծանօթներից մինը—
Տրուենիցկին։ Որքան կարող ես ուշադիր եղիր գէպի նա։

Նաու լաւ մարդ է։ Երէկ մի տան միասին հիւր էինք, քո
մասին շատ էր հարց ու փորձ անում։

—Միտս չի գալիս, աչդ ո՞վ պէտք է լինի, — խորհրդաւոր ժրպ-
տաց Հեղինէն, — Հա՛, այժմ՝ յիշեցի, անցեալ տարի նա լինում էր
մեզ մօտ։

Եւ զարթնեց Հեղինէի երեւակայութեան մէջ կանոնաւոր, ճուաճե-
ու թխազոյն դէմքով և շէկ մաղերով, բարձրահասակ և վայելչա-
կազմ երիտասարդի պատկերը. նա լաւ յիշեց, որ Տրուենիցկին, չը
նայելով, որ զեզեցիկ տղամարդ է, իւր վերայ անախորժ ապաւորու-
թիւն էր գործում։

—Հիանալի մարդ է, ոչ մի պակասութիւն չես կարող գտնել
մէջը, — հանեց նորան մտախոհութիւնից իշխանուհին։ Խեղօք, ճարտար
տղայ է. բացի զորանից հացը մեծ կապեր ունի Պետերբուրգում,
անկասկած որդին շատ առաջ կը գնայ։

Հեղինէն անտարբեր ականջ էր դնում իշխանուհուն։

Երբ որ ճաշին բոլոր հիւրերը հաւաքւեցին և օրիորդը մտաւ
դահլիճը, Տրուենիցկին բարձր հասարակութեան մէջ կրթւած կընտէրի
յատուկ ճարպիկութեամբ վազեց մօտը և սկսեց հաճոյախօսութիւններ
թափել գլխին։ Հեղինէն ուշի ուշով նայեց նորա վերայ, կարծես
ցանկանալով սոուզել իւր առաջւայ կարծիքը. — նո՛յն յանդուգն
ծաղրը նրբագիծ շրթունքներին, նո՛յն կեղծ հայեացքը մեծ խա-
ժագոյն աչքերում, նո՛յն լիրբ անձնապատանութիւնը բոլոր շարժ-
ւածքներում։

Ճաշին Տրուենիցկին նստած էր Վրթանէսեանի կողքին։ Մի քիչ
քէֆովանալով, նա դարձաւ իւր հարևանին և շէնջեց նորա ականջին.

— Ի՛նչ սքանչելի, ի՛նչ սիրուն է ձեր մօրաքրոջ աղջիկը։ Երևի
յաճախ համբուրում էք նորան, օգտւելով եղբայրական իրաւունքից։

Վրթանէսեանը քիչ էր մնում տեղն ու տեղը պատառ պատառ
անէր լիրբ հարևանին, բայց իրան զսպեց։

Տրուենիցկին չէր հեռացնում Հեղինէից իւր վավաշոտ հայեացքը
և շարունակում էր իւր անպատկառ խօսակցութիւնը Վրթանէ-
սեանի հետ։

— Զայներդ կտրե՛ք, պարոն, թէ չէ պատուհանովը դուրս կը գցեմ ձեզ, — շնչեց նորա ականջին Վրթանէսեանը, կարմրաոտակած կատաղութիւնից։

— Մ'ի, ա՛յ, ա՛յ, տես ինչ կրակի կտորն է եղել, է՛, բարեկամ շատ խալն էք երևում, — ծիծաղի գցեց Տրուհիցկին։

— Մի քանի րոպէ անցած նա արդէն զբաղեցնում էր տիկիններին ու օրիորդներին քաղաքի ասէկօսէն երով, բամբասանքներով։

— Ինչո՞ւ չէք խմում, պարոններ, — հիւրասիրում էր տանտէրը։ — Բարեբեր Կովկասը այնպիսի անմահական խմիչք է ժեզ պարգևել, որ յանցանք է չը խմելը։

Ճաշից յետոյ տղամարդիկ սկսեցին բարձրաձայն խօսել. մէկը յարձակում էր մոքերը վարակող նոր գաղափարների դէմ. միւսը հրապարակ էր հանում իւր ծանօթի կեանքի գաղտնիքները, մի ուրիշը տիկիններին զբաղեցնում էր երկդիմի, անպատկառ հաճոյախօսութիւններով, որ լսելով Հեղինէն ամօթից կարմրում էր։ Մի ժամից յետոյ տիկինների ու տղամարդկանց մեծ մասը նստեցին թուղթ խաղալու։ Հեղինէն գնաց իւր սենեակը։

Այդպէս էին ժամանակ անցնում միշտ իշխանն ու իշխանուհին. օր օրից տարբերում էր միայն աննշան փոփոխութիւններով, իսկ ընդհանուր ոգին նոյնն էր։

— Պէտք է զարմանալ, որ շրջապատողների դատարկութիւնը չի ազդել Հեղինէի վերայ, մոռածում էր Վրթանէսեանը փնտրելով սենեակներում մօրաքրոջ աղջկան։

— Ես եմ ասում, ո՞րտեղ ես, — ասաց նա գտնելով Հեղինէին։ Այստեղ շատ տօթ է, գնանք պարտէզ։

— Շատ լա՛ւ, իմ սիրտս էլ է ուզում պարտէզ գնալ։ Եւ նոքա թեւանցուկ արած՝ իջան օլարտէզը, ուր՝ չը նայելով օրւայ շոքին՝ շատ հով էր։

— Այն ի՞նչ էիր կարդում, Հեղինէ, — հարցրեց Վրթանէսեանը երբ որ նոքա մտան պատատուկներով շրջափակած հովանոցը և նստեցին։

Քո բերած գրքերիցն է։ Նորանում նկարագրած անձնաւորութիւններից մէկը ինձ հիացնում է՝ ո՛րքան զգացմունք, ո՛րքան հաւատ ունի զէպի լաւը։

Ահա իսկ հերոսական հոգու տէր մարդ: Իմ կարծիքով, այդպիսի մարդիկ առաջւայ ժամանակները պէտք է աւելի շատ լինէին քան այժմ:

—Ինչո՞ւ:

—Այն ժամանակւայ կեանքը այժմեանի նման չէր. հերոսութիւն ցոյց տալու առիթներ աւելի էին պատահում, անվճռաբար պատասխանեց Հեղինէն: Կամ գուցէ հերոսական հոգու տէր մարդիկ հիմիկանից աւելի առիթներ չէին ունենում իրանց ցոյց տալու, բայց եղած առիթներից օգուտ էին քաղում...:

—Ճիշտ է, Հեղինէ, ներկայ ժամանակը աղքատ է նշանաւոր տաղանդների կողմից, բայց դորանից չի կարելի եզրակացնել, թէ հասարակութեան բարոյական ոյժերն էլ սպառւել են:

—Հապա ինչո՞ւ այժմ դժւար է գտնել այնպիսի նշանաւոր մարդիկ, որոնք հազար ու մէկ վտանգների ու հալածանքների ենթարկւելով դիմում են իրանց որոշած նպատակին և մի քաջ անգամ չեն շեղւում նորանից:

—Առաջւայ ժամանակի մտաւոր կեանքը առաջ էր գնում հասարակութեան աննշան փոքրամասնութեան, մի քանի անհատների գործունէութեան շնորհիւ, անհատների, որոնք՝ խիստ տարբերւելով իրանց շրջապատողներից՝ աւելի ևս զարմանք են պատճառում մեզ իրանց եռանդով: Իսկ այժմ, Հեղինէ, այդպիսի անհատները էլ մեզ հսկաներ չեն թւում:

—Լաւ, նիկօլա: Շատերն ասում են, թէ առաջ կարելի էր հերոսական գործեր կատարել, զոհւել, վրէժխնդիր լինել ճշդողներից, իսկ այժմ միթէ՞ այդ բոլորը անելու առիթներ չը կան: Բող աժեն մէկը վճռի վարւել այնպէս ինչպէս արդարութիւնն և ճշմարտութիւնն է պահանջում և շուտով կը զգայ, որ իւր մէջ էլ հերոսական ոգի կայ:

—Մի քիչ խորը որ նայես հարցին, Հեղինէ, հայեացքդ կը փոխես այժմեան կեանքի վերայ: Բանն այն է, որ այն ոյժը, որ առաջ կետրօնացած էր սակաւաթիւ անհատների մէջ և շլացնում էր իւր հսկայական ծաւալով, այժմ հազարաւոր մասերի բաժանւելով, մանրացել է. բայց չէ որ այդպիսով նա մատչելի է դարձել հասարակ ամբօխի համար: Առաջւայ հսկաները իրանց մէջ էին ամ-

փոփում իրանց ժամանակակից հաւարակութեան բոլոր մօտաւոր ու բարոյական ոյժերը: Եւ որովհետեւ նոքա կատարեալ և միակ ներկայացուցիչներ էին այդ ոյժերի, անձնական ներկայացուցիչներ և ոչ հասարակական, քանի որ այն ժամանակ չը կար հասարակական ինքնագիտակցութիւն, - նոքա լուսաւորում էին միայնակ, թէև ի հարկէ շլացուցիչ լոյսով: Նոցա վառած ճշմարտութեան լապտերը այժմ լուսաւորել է ամբողջ աշխարհը: գիտնականների փակուած շրջանից նա տարածւել է և թափանցել ամբոխի խորքերը, մօտել աղքատի խրճիթը: Մի ժամանակաւ ազնւասիրական, արիստոկրատական գիտութիւնը այժմ ռամկավարական, դեմօկրատական է դարձել:

Հեղինէն գլխով նշան արեց, թէ չի հասկանում վերջին խօսքերի միտքը, բայց Վրթանէսեանը չը նկատեց այդ. իսկ յետոյ երբ որ տեսաւ մօրաքրոջ աղջկայ իւր վերայ յառած հարցական հայեացքը, սկսեց բացատրել:

— Այսինքն գիտութիւնը այժմ իւր առաջնայ անմատչելի բարձրութիւնից իջել է և դիւրամբօնելի է դարձել հասարակ մահկանացուների համար: Այժմ ռամկավարական սկզբունքն է իշխում հասարակական կեանքում, այնպէս որ հասարակութեան շահերին ծառայելու համար պէտք է անպատճառ հերոս, հանճար լինել, հասարակ մահկանացուն էլ այժմ կարող է գործել հասարակութեան օգտին...

Վրթանէսեանի խօսքը բերնին մնաց, որովհետեւ այդ բոլորին լսեց վերևից իշխանուհու ձայնը. նա կանչում էր Հեղինէին դաշնամուր ածելու: Հեղինէն անսիրտ վերև բարձրացաւ իշխանուհու կամքը կատարելու: Երկու-երեք կտոր ածելուց յետոյ նա նորից իջաւ պարտէզը և լուռ սեղմեց Վրթանէսեանի ձեռքը:

— Ի՞նչ ես միտք անում, Հեղինէ:

— Ես դեռ քո խօսածի ազդեցութիւնից չեմ ազատւել:

— Եւ երևի մտքովդ անցնում է, թէ ձեզ մօտ հաւաքուող հիւրերից անշուշտ շատ քչերն են որ և է լուրջ սկզբունքներով զեկավարւում իրանց կեանքում: Այո՛, Հեղինէ, նոցա մեծ մասը ռենվէյն են խմում, շքեղ կառքերով զբօսնում ու վատնում հօրական փողերը առանց մտքներովն անգամ անցկացնելու թէ մարդս կեսնքում մի որ և է կոչումն ունի:

—Ինչպէս Տրունիցկին, — հեգնական ժպիտով արտասանեց Հեղինէն և սաստիկ կարմրեց:

—Հեղինէ՛, Հեղի՛կ, ո՛րտեղ ես, չես երևում, — լսեց յանկարծ մի քայլ հեռուից:

Ձայնը ծանօթ էր. Հեղինէի սիրտը թնդաց, երեսը պայծառացաւ, և նա ուրախ- ուրախ վազ տւեց շքեղ հագնւած ջահէլ տիկնոջը դիմաւորելու:

—Բարեւ, սիրելի Հեղիկ:

—Կատեա, այդ դո՞ւ ես, սիրտս ուրախութիւնից ուզում է ճաքել, Ո՞ր խաչիցն է, — աղաղակեց Հեղինէն փաթաթւելով ընկերուհու վզին:

—Ձանիս դարդ է դարձել, որ այսքան ժամանակ է այստեղ եմ ու նոր եմ քեզ մօտ գալիս:

—Վաղո՞ւց ես եկել:

—Երկու շաբաթ կը լինի:

Հեղինէն յանդիմանօրէն նայեց նրան:

—Ների՛ր, հոգիս, հաւատա, որ ամեն բոպէ մտքումս եղել է քեզ մօտ գալ, բայց չեմ կարողացել կատարել սրտիս փափագը: Դու դեռ չը դիտես, թէ ինչ գլխացաւանք է տուն ու տեղ սարքելը: Ծիծաղդ չի՞ գալիս, որ ես այժմ տիկին եմ, հա՛, հա՛, հա՛:

—Շատ ծիծաղելի է երևում ինձ, — Կատեան՝ տիկին, Բայց ես մոռացայ՝ առաջինը — շնորհաւորել մարդու գնալը և երկրորդ՝ ներկայացնել քեզ իմ մօրաքրոջ որդի — Վրթանէսեանին: Նիկողայոսը անշնորհ կերպով գլուխ տւեց, և մի քանի բոպէից յետոյ հեռացաւ իւր սենեակը:

—Մօրաքրոջդ որդին ինձ դուր եկաւ, ափսոս որ լաւ ձևեր չ'ունի, — ասաց Կատարինէն նորա գնալուց յետոյ:

—Օ՛, հիանալի աղայ է, հաւատացած եմ, որ շատ կը հաւանես նորան:

—Այժմ այն միայն տեսայ, որ հասկացող մարդ է, մեզ մենակ թողեց: Ես քեզ հետ շատ բան ունեմ խօսելու:

Նոքա ձեռք ձեռքի տւին, նստեցին ահագին ընկուզենու տակ և սկսեցին պատմել միմիանց այն բոլորը, ինչ որ գլխներովը անցել էր վերջին երկու տարւայ ընթացքում:

III

Թ-ից հեռանալու նախընթաց օրը Վրթանէսեանը ձեռները յետևին դրած մտայոյզ ման էր գալիս դահլիճում: Իշխանն ու իշխանուհին տանը չէին: Հեղինէն տխուր կանգնած էր պատշգամբը տանող ապակիաշէն դրան մօտ և շուտ շուտ նայում էր մօրաքօջ որդուն:

— Մի, ի՞նչ պէտք է անեմ քո գնալուց յետոյ, — յանկարծ դուրս թռաւ բերնիցը:

Նորա ձայնի տխրութիւնը սաստիկ յուզեց, կսկծացրեց Վրթանէսեանի սիրտը: Նա մի քանի խօսք ասաց նորան մխիթարելու համար և հարցրեց:

— Ինչո՞ւ է Կատարինէ Սահառունին այդքան ուշ-ուշ գալիս քեզ մօտ:

— Որովհետեւ քեռակինը շատ սառն է ընդունում նորան և առհասարակ...:

— Գիտեմ, իշխանուհին քո ուղածի հակառակն է անում, որովհետեւ չը կարողացաւ քեզ համոզել պսակելու Տրունիցիու հետ: Լա՛ւ, իսկ քեռի՞ն, նա՛ ինչպէս է վերաբերում այդ հարցին:

— Քեռին շատ չէր ստիպում, որովհետեւ նա առհասարակ դէմ է հայ աղջիկների օտարաղգիների հետ պսակելուն:

— Եւ կատարեալ իրաւունք ունի:

— Ի՞նչ ես միտք անում, Նիկօլա:

— Մտածում եմ այն պայմանների մասին, որոնց մէջ դու ապրում ես. ինձ դեռ երբէք այնքան պարզ չէր թւել այդ պայմանների անհեթեթութիւնը որքան այսօր:

— Յետո՞յ:

— Զարմանում եմ, թէ ի՞նչպէս ես կարողացել անմնաս մնալ այդպիսի պայմաններում:

— Դորա պատճառն այն է, որ ես ինձ շրջապատող կեանքի վերայ նայում եմ իբրեւ մի օտար, ինձ համար խորթ բանի վերայ: Ես ինքս էլ չեմ հասկանում, ինչիցն է, որ, միայն զրքերում կարողացած լինելով, թէ կայ և ուրիշ տեսակ կեանք, ես հաւատացած եմ, որ ապագայում ինձ աւելի լաւ կեանք է վիճակւած:

Ասաց այդ՝ զգացւած ձայնով՝ և նազելի շարժմունքով յետ

դցեց սև մաղերը. աչքերը և երեսը վառուում էին. Վրթանէսեանը բռնեց ձեռքը՝

— Զեր մէջ, կանանց մէջ, սիրելի Հեղինէ, մի ինչ-որ զօրաւոր բնազդումն կայ, որի շնորհիւ դուք զարմանալի հեշտութեամբ մաքրուում էք կեղտից ու ցեխից և յաճախ ձեր հոգու ազնուութեամբ յազթում էք արտաքին անբարեյաջող հանգամանքները:

Իշխան Շակունին եկաւ և ընդհատեց նոցա խօսակցութիւնը:

Հետեւեալ առաւօտը Վրթանէսեանն ու Հեղինէն բաժանեցին իրարից: Երկուսն էլ միմեանց ամենաքաղցր զգացմունքով էին յիշում: Զորս ամիսը նոցա համար շատ շուտ անցաւ, բայց ոգևորւած ուսանողի ազդեցութիւնը վաղանցուկ չ'եղաւ. նորա ցանաճ սերմը շատ խոր արմատ քցեց Հեղինէի սրտում:

Թէև Հեղինէն շատ հարցերի մասին ինքնուրոյն հայեացք էր կազմել, բայց շատ բան էլի նորա համար մութն էր. նրան ամենից աւելի հետաքրքրող հարցերից շատերը ինքը չ'էր կարողանում լուծել, և այդ պատճառով նորա աշխարհահայեացքը շատ որոշ չ'էր:

Վրթանէսեանի ղնալուց յետոյ մի քանի շաբաթ էր անցել:

— Շնորհաւորում եմ ծնունդդ, Հեղիկ, — աղաղակելով ներս ընկաւ. Հեղինէի սենեակը տիկին Սահառունին և հանեց գրպանից մի փոքրիկ արկղ:

— Զուր ես նեղութիւն քաշել, սիրելի Կատեա, դու գիտես, որ ես զուքս ու զարդարանք սիրողներիցը չեմ:

— Գիտեմ, հոգիս, բայց վերցրու այս ինձնից քեզ յիշատակ:

Սահառունին հանեց արկղիկից մի գեղեցիկ փոքրիկ մեղալիօն՝ մէջը դրած իւր լուսանկարը:

— Ա՛խ, ես բոլորովին մոռացել էի, որ այսօր քո ծննդեան օրն է, շնորհաւորում եմ,— կիսաբերան ասաց իշխանուհին, տհաճութեամբ վայր դնելով խաղաթղթերը և համբուրեց Հեղինէի ճակատը: 19 տարիդ լրացաւ, գիտե՞ս, Հեղինէ,— առանձնապէս շեշտելով աւելցրեց իշխանուհին, և նորից խորասուզեց թղթախաղի մէջ:

Երբ որ տիկին Սահառունին պատրաստուում էր գնալու, իշխանուհին խնդրեց նորան, որ մնայ ճաշին:

— Կը մնամ միայն այն պայմանով, որ Հեղինէն վաղը գայ ինձ մօտ ու ամբողջ օրը մնայ:

—Ապահով եղէք, Եկատերինա Խանօֆնա, ձեր խնդիրքը կը կատարուի, լսեց կողքի սենեակից իշխանի ձայնը:

Ասաց իշխանը ու մտաւ այն սենեակը, որտեղ նոքա էին, համբուրեց Հեղինէին ու տւեց նրան մի փոքրիկ մինէազարդ ժամացոյց:

—Ի՛նչ հիանալի կին էք դարձել, — դիմեց նա տիկին Սահառունուն:

—Հապա ի՞նչ էիք կարծում, կոտրտւելով գլուխը թափ տւեց նա: Դուք, իշխան, ամենևին չէք փոխւել:

—Դուք ինձ միթէ յիշում էք:

—Ինստիտուտի աշակերտուհիներից ո՞ր մէկը չի յիշում բարի քեռուն, որ միշտ քաղցրեղէններ էր բերում իւր քրոջ աղջկան: — Իշխանը բարձրաձայն ծիծաղեց:

—Ե՛րբ էք մեզ ծանօթացնելու ձեր հոգևորի հետ: Նրա հօր հետ լաւ բարեկամ էինք: Դուք այսօր մեզ մօտ էք ճաշելու, վճուած բան է: — Եկատերինէն ի նշան հաւանութեան ժպտաց:

—Շատ լաւ, ես ճաշին հետս ուրախ հիւրեր կը բերեմ:

Գեներալը գնաց:

Միւս օրը իշխանուհին Հեղինէին տարաւ Սահառունիների մօտ:

—Ո՞ր է, ինչու չի գալիս մարդդ այսքան ժամանակ, Կատեա:

—Շուտով կը գայ: Բայց ի՞նչ անհամբերութեամբ ես սպասում նորան, Հեղիկ, չը լինի կարծում ես, թէ շատ գեղեցիկ է:

—Քո նկարագրածին նայելով, պէտք է որ այդպէս լինի, — ժպտաց հեղինէն:

—Ձուր ես կարծում, հոգիս վախենում եմ, հիասթափեա: Բայց ճիշտ որ ինչո՞ւ այսքան ուշացաւ, շուտով ժամի երեքը կը լինի: Ես քեզ շատ անյարմար օր հրաւիրեցի: Մոռացել էի որ այսօր երեկոյեան մեզ մօտ հաւաքւելու են մի գործի համար: Գէորգը երեւի ընկերներից մէկի մօտ նստած խօսքով է ընկել:

Կողքի սենեակում լսեց Սահառունու ոտնաձայնը:

—Ահա և իմ հոգևորը, աղաղակեց Կատեան: Պարոն, ձեր կողմից շատ անքաղաքավարութիւն է այսքան երկար սպասել տալ:

—Ներողութիւն, սիրելիս, իմ կամքովս չեմ ուշացել, գործ ունէի:

Մինչև Կատեայի ծանօթացնելը, Հեղինէն կարողացաւ նկատել Սահառունու բարձր հասակը, գունատ և, թէև անկանոն, բայց ազդու դէմքը՝ սև, մի քիչ զանգուր մազերով: Բայց ամենից աւելի համակրելի արտայայտութիւն էին ապիս նորա դէմքին սպիտակ, բաց ծակատը և մեծ, մուգ աչքերի անկեղծ հայեացքը:

—Այնքան է խօսել ձեր մասին կինս, որ ես առանց տեսնելու համարեա ճանաչում էի ձեզ, — ասաց Սահառունին նստելով Հեղինէի կողքին:

—Ի՞նչն էր խանգարում ձեզ կատարելապէս ծանօթանալու ձեր կնոջ ընկերուհու և դեռ աւելի՝ ազգականուհու հետ, — հարցրեց նա ժպտալով:

—Այդ որ՝ է՛լ մի ասի, — ընհատեց նորա խօսքը Կատեան. Գէորգս մարդամէջից փախչող է:

—Այս անգամայ նկատմամբ ասածդ իրաւացի է: Ես երկու անգամ զնացել եմ իշխան Շակունու մօտ. առաջին անգամին ոչ ոք չը կար տանը, երկրորդ անգամ՝ ինձ ասացին, թէ իշխանուհին հիւանդ է, իսկ դուք, օրիորդ, պարապում էիք ուսուցչի հետ:

—Հեղինէն միշտ կամ դաս է առնում կամ ուրիշին դաս է տալիս, դա այդ պակասութիւնն ունի, կիսահեգնօրէն ասաց սեղանատուղից Կատեան:

Այդ խօսքերի հեգնական եղանակը գուր չեկաւ Սահառունուն, որ իսկոյն աւելցրեց.

—Սակայն այդ շատ գովելի պակասութիւն է, այդ պակասութեան շնորհիւ մարդ կարող է իւր բնաւորութեան շատ վատ կողմերը ուղղել:

—Ով գիտի դուք ինչ եզրակացութիւններ հանէք Կատեայի խօսքերից, կարմրելով ասաց Հեղինէն:

—Միք վախենալ, մոքովս ոչինչ վատ բան չ'անցաւ. ես մի բան եզրակացրի և եթէ չը վախենայի թէ հաճոյախօսութեան տեղ կ'ընդունէք, կը յայտնէի ձեզ եզրակացութիւնս:

Սահառունու պարզ, բարեկամական վարմունքը քիչ քիչ դրաւ եց Հեղինէի սիրտը և նա վստահաբար նայեց նորան:

—Մի օր կ'ասէք ինձ, թէ ի՞նչ եզրակացրիք, այնպէս չէ՞ Գէորգ Ալեքսանդրօսի: — աշխուժով արտասանեց Հեղինէն:

—Ի՛է՛, համեցէ՛ք ծաշելու, լսեց Կատեայի ձայնը:

Ճաշը շատ ուրախ անցաւ: Վաղուց էր, որ Հեղինէի սիրտը այնքան չէր ուրախացել, որքան այդ օրը:

Ժամի վեցի սօտերքը Սահառունու առանձնասենեակը սկսեց լցւել երիտասարդներով: Ներողութիւն խնդրելով Հեղինէից, նա գնաց նոր հիւրերի մօտ: Այնտեղ շուտով սկսեց բարձրաձայն խօսակցութիւն. տաք տաք վիճում էին: Հեղինէի ու Կատեայի նստած սենեակից պարզ լսուում էին նոցա բոլոր խօսքերը: Ժամի 8-ին օրիորդին յայտնեցին, որ իշխանուհին կառքը ուղարկել է նորա յետևից: Իշխանի քէջն եկաւ, որ տեսաւ Հեղինէին ուրախ ու զւարթ տրամադրութեան մէջ, և խոստացաւ յաճախ թողնել նորան Սահառունիների մօտ, բայց, որովհետև իշխանուհին շատ անդամ հակառակում էր այդ բանին, այդ բաղդին Հեղինէն շատ ուշ ուշ էր արժանանում: Նա մեծ ուրախութեամբ էր յիշում Սահառունիների տանը իւր անցրած մի քանի ժամերը, նա զգում էր, որ այնտեղ աիրում է մի ուրիշ, աւելի բանական կեանք, որ մարդիկ այնտեղ հաւաքւում են ոչ թէ չլատարկ ժամանակ անցկացնելու համար, այլ մտածում, աշխատում են օգտակար գործ կատարելու, մի որ և է նպատակ ունեն առաջներին:

Այն օրից երբ լրացաւ Հեղինէի 19 տարին, նա նկատում էր, որ քեռակինը ուզում է նորան անպատճառ մարդու տալ: Այնուհետև Հեղինէն իրան օտարի նման էր զգում քեռու տանը. կարծես խորթ լինէր: Իւր անմխիթար վիճակից նա միայն մի ելք էր տեսնում, այն է պսակւել մի արժանաւոր և սիրած մարդու հետ, և առիթը շատ շուտով ներկայացաւ:

Մի օր իշխանուհին ու Հեղինէն գնացել էին քաղաքից դուրս գտնուող այգիներից մէկը նւագահանդէսի (կօնցերտ): Իշխանուհուհին ծանօթներից մէկը՝ գեներալ Միհրանովի կինը՝ ծանօթացրեց նորան և Հեղինէին մի երիտասարդի հետ, որի գեղեցիկ տեսքը և նուրբ ձևերը երկուսին էլ դուր եկան: Հեղինէն նորան արդէն տեսել էր Սահառունիների տանը, բայց հարևանցի կերպով:

—Ամիրանովը ամուսնուս ընդունակ և ճշտապահ աստիճանա-

ւորներից մէկն է: Ուսումնառած, լաւ կրթութիւն ստացած, յաջողակ մարդ է, մի խօսքով, ես հաւատացած եմ, որ նա իւր փայլուն ընդունակութիւնների շնորհիւ շատ առաջ կ'երթայ,—գովաբանում էր Ամիրանովին Նիղաւետա Բօգդանովնա Միհրանովան իշխանուհու առաջ, մինչդեռ Հեղինէն նոր ծանօթի հետ զմայլում էր գիշերւայ գեղեցկութիւններով և երաժշտութիւնով: Միհրանովան միտքը դրեց պսակել Ամիրանովին Հեղինէի հետ, գիտենալով, որ դորանով թէ իշխանուհուն և թէ իւր մարդու աստիճանաւորին մեծ ծառայութիւն մատուցած կը լինի: Նա իբրեւ գործնական կին լաւ գիտէր, որ մարդիկ այդպիսի ծառայութիւններ չեն մոռանում:

Հետեւեալ օրը Ամիրանովը այցելութեան գնաց իշխան Նակունուտունը: Նա շուտով գրաւեց թէ իշխանի թէ իշխանուհու համակրութիւնը և սկսեց յաճախել նոցա մօտ:

Ամիրանովը աղքատ տանից էր: Նորա քեռին Ուբարովը, որ ունեւոր մարդ էր և ամուրի, նորան դեռ երեխայ ժամանակը տարել էր իւր հետ Մոսկւա, ուր ինքը առեւտուրով էր պարապում: Ուբարովը ոչինչ չէր խնայում իւր քեռորդու համար. նա նորան տւեց Մոսկւայի ամենալաւ գիշերօթիկ դպրոցը, իսկ դպրոցում ուսումը աւարտելուց յետոյ տարեկան նրան որոշեալ գումար էր տալիս, որ համալսարանում ուսումը շարունակի: Այն ժամանակը, երբ Ամիրանովը պէտք է երկրորդ կուրսից երրորդը փոխէր, քեռուն դժբախտութիւն պատահեց. նա կոտոր ընկաւ և էլ չէր կարողանում օգնել քեռորդուն: Ամիրանովը սկսեց ելք փնտրել իւր դժւար դրութիւնից և շուտով նրան յաջողեց մի քանի շահաւէտ դասեր գտնել: Իսկ քեռուն նա սկզբում զանազան ճշմարտանման պատուակներով քանի գնում աւելի ուշ ուշ էր այցելում, յետոյ վերջապէս սկսեց քաջայայտ արհամարհանքով վերաբերել նրան: Քեռորդու ապերախտութիւնը այն աստիճան զայրացրեց Ուբարովին, որ նա վճռեց ընդ միշտ դադարեցնել նորա հետ ազգականական յարաբերութիւնները:

Ամիրանովը դեռ համալսարանում եղած ժամանակը հմուտ էր ամեն բանից օգուտ քաղելու արհեստին. նա գիտէր թէ ում հետ ունեցած ծանօթութիւնից ու յարաբերութիւնից իրան շահ կարող է լինել, ում մօտ ինչ մտքեր պէտք է պաշտպանի և ինչպէս պէտք է վարւի, որ թակարդ չընկնի. այնպէս որ աղքատութիւնը նորա

ապագայ ասպարէզի համար արգելք չէր կարող լինել: Նորա քաղաքավարի վարմունքը տիկիների հետ, կանոնաւոր դժերով, թուխ, գեղեցիկ դէմքը, օրիորդների հետ զանազան դատարկ բաների մասին ճարտար խօսելու ընդունակութիւնը, նոցա հայրիկների վերաբերութեամբ պարտուպատշաճ յարգանքի ցոյցերը և երեսաներին գրաւող պուտ ընծաները՝ համարեա ամեն տեղ յաջողութիւն էին ունենում և նա գրկաբաց ընդունելութիւն էր գտնում: Ամիրանօվը շատ շուտ հասկացաւ, որ իրան շատ ձեռնաու է պսակել շեղինէի հետ: Բացի դորանից նրան շատ էր դուր գալիս օրիորդի գրաւիչ ու գեղեցիկ դէմքը. այնպէս որ մի շաբաթ անցած նա բոլորովին գրաւեց այդ յաջողակ մտքով:

— Ծիշտ է, ես դեռ ջահէլ եմ և ասպարէզս դեռ ապահովւած չէ, բայց չէ՞ որ գեղեցիկ կնոջ, ազդեցիկ ազգականների, կապերի և կանանց իրանց ամուսինների շահերը պաշտպանելու բնատուր վարպետութեան շնորհիւ աւելի հեշտ կը լինի հասնել ցանկալի նպատակին, — ինքն իրան մտածում էր նա, ինքնագոհ ժպիտն երեսին երևակայելով իրան առաջը բացող փառաւոր ապագան:

Ամիրանօվը իւր բնատուր գործնականութեան շնորհիւ կարծածիցը աւելի շուտ կարողացաւ իրագործել իւր մտադրութիւնը: Տեսնելով որ օրիորդը ընթերցանութիւնով ու երաժշտութիւնով է պարապում միշտ, նա սկսեց նորա համար գրքեր ու նոտաներ տանել. շատ անգամ էլ նորա համար գրքեր էր կարդում, և գտնելով նորա թոյլ երակը, պաշտպանում էր նորա սիրած զաղափարները կեղծ ոգևորութեամբ: շեղինէն չէր նկատում նորա կեղծութիւնը, որովհետև նա շատ լաւ էր կեղծում. ուրախութեամբ լսում էր նորա խօսքերը և աշխատում էր առիթներ գտնել նորա հետ մենակ մնալու:

Ամիրանօվը նկատելով, որ օրիորդը չի սիրում իրանց մօտ հաւաքւող հասարակութիւնը և փախչում է նորանից, ինքն էլ շատ անգամ հեռանում էր միւս հիւրերից, գնում էր նորա մօտ պատշգամբը և սկսում էր անխնայ յարձակել այդ հասարակութեան վերայ:

— Եկայ ձեզ հետ մաքուր օդ ծծելու, օրիորդ շեղինէ, քիչ էր մնում սիրտս պատռէր նոցա անմիտ գեղեցկութիւնից:

— Ի՞նչ է ձեզ ամենից աւելի վրդովեցնում, — հարցրեց շեղինէն, հանգիստ նայելով նորա երեսին:

—Նոքա կանանց վերայ նայում են իբրև սեպհականութեան վերայ, օրիորդի վերայ—իբրև ապրանքի վերայ, որից պէտք է ազատուել յարմար առիթ պատահածի պէս. նոցա նման անզգայ մարդկանց ի՞նչ բանն է խօսել կնոջ պէս աղնիւ ու սքանչելի էակի մասին:

—Զարմանալի է, Միխայիլ Պետրովիչ, դուք այդպէս զայրացած էք խօսում նոցա մասին, իսկ հետները շատ քաղցր էք վարւում. ներեցէք, որ այսպէս անկեղծ յայտնում եմ ձեզ իմ միտքս, —ասաց օրիորդը և սաստիկ կարմրեց:

Ամիրանովը մի քիչ շփոթւեց, բայց վարժւած լինելով յուզմունքները զսպելու, շուտով ուզղւեց.

—Ընդհակառակը, ես շատ շնորհակալ եմ, որ անկեղծ էք վարւում ինձ հետ, անկեղծութիւնը մտերմանալու առաջին քայլն է. միւս կողմից՝ այդ միջոցով միայն մենք կարող ենք փարատել ժամանակ առ ժամանակ մեր մէջ ծագող տարակուսանքները:

Ամիրանովի քարցրահնչիւն ձայնը մի քիչ գողում էր. Հեղինէն զգացւեց և սիրալիր հայեացք քցեց նորա վերայ:

—Բանն այն է, օրիորդ, որ այդ տեսակ մարդկանցից շատերը նոյնպէս կատարելութեան են ձգտում, բայց թոյլ կամքի տէր լինելով, ուզում են առանց ջանքի, առանց աշխատանքի կատարելութեան հասնել, — և ահա այդ դէպքում, եթէ նոքա տեսնում են, որ իրանց հետ արհամարհանքով են վերաբերւում, նոցա սրտում քնացած վերջին կայծն էլ հանգչում է: Միւս կողմից, — շարունակում էր նա ձայնը դողացնելով, որ սաստիկ տպաւորութիւն է գործում լսողների վերայ, — անարատ սիրտը մարդկանց ատել չի կարող: Ատելութիւնը վնասակար բան է. անհամբերող ոգին կորցնում է որ և է լուսաւոր գաղափարով ոգեւորւելու ընդունակութիւնը:

Ամիրանովը նկատեց, որ իւր խօսքերը Հեղինէի վերայ սաստիկ տպաւորութիւն գործեցին:

Հետեւեալ օրը մտնելով Շակունիների մօտ նա տեսաւ, որ օրիորդը խորասուզւած է ընթերցանութեան մէջ, բարեկամաբար խրախուսեց նորան և սկսեց երկար ու բարակ խօսել կանանց կրթութեան օգտի մասին:

Հեղինէի միտքը զբաղւած էր կանանց ազատութեան, էմանսիպացիայի հարցով: Ամիրանովը այդ գիտէր և երբեմն, աչքի տա-

կով թաքուն նայելով նորա վերայ, ինքն իրան ասում էր, — այդ բոլորը քո սիրուն, տաքգլխի ցնորքներն են, մարդու գնաս՝ կը խոհեմանաս: Քեզնից թունդ օրիորդներ ենք աեսել, բայց մարդու հմուտութիւնն ու հաստատ կամքը ամեն բան ուղղել են:

Կըթուլթեան մէջ Ամիրանօվը ամենից բարձր էր դասում երաժշտագիտութիւնը. թէև շատ քիչ էր պատահում, որ նորա հոգին զմայլէր երաժշտութեան քաղցր հնչիւններից, բայց նա երաժշտագիտութիւնը անհրաժեշտ էր համարում բարձր դասին պատկանող կնոջ համար, երաժշտութիւնը հասարակութեան մէջ փայլելու լաւ միջոց համարելով: Հեղինէն շատ լաւ էր դաշնամուր ածում: Ամիրանօվը ժամերով ստիպում էր նորան ածել, բարձրաձայն յայտնում էր իւր հիացումը, գովում էր նորա ձիրքը և երկար ու բարակ խօսում էր երաժշտութեան նշանակութեան և այն խորը ազդեցութեան մասին, որ նա գործում է մարդու սրտի վերայ:

Անցաւ մի շաբաթ, և Հեղինէն սկսեց մտերմանալ Ամիրանօվին, համարելով նորան իրանց տանը այցելող սակաւաթիւ երիտասարդներից ամենաազնիւր և ամենախելօքը, և շուտով հաւանութիւն տւեց, երբ որ Ամիրանօվը պսակելու առաջարկութիւն արեց:

Հեղինէն զգում էր, որ Ամիրանօվին դեռ բոլորովին հոգով սրտով չի սիրում, ոչ էլ մարդու գնալու մեծ փափագ ունէր, բայց որ միտքն էր գալիս քեռականջ հետզհետէ սաստկացող գանգատները և անվերջանալի փնթփնթոցը ու նորա խորհրդաւոր շէնջոցը քեռուհետ, ամուսնութիւնը փառք էր երևում այդպիսի կեանքի հետ համեմատելով: Քեռու տանը Հեղինէն իրան վատ էր զգում. իշխանուհու արհեստական քաղցրութիւնը, վարմունքի իշխանական եղանակը և նորա որբութիւնը յիշեցնող անվերջանալի ակնարկութիւնները, իսկ երբեմն մինչև անգամ և դառն նախատինքները՝ անտանելի էին դարձնում նորա վիճակը, չը նայելով որ նորան շատ էր սիրում իւր բարեսիրտ քեռին, որ, ինչպէս առաջ էլ ասացի, ցերեկը համարեա սկի տանը չէր լինում կամ թէ տուն էր գալիս մի խումբ հիւրերի հետ: Հեղինէն վաղուց համոզւել էր, որ իւր և քեռականջ ջուրը մի առումով չի կարող գնալ. ինչ որ ասում է, ինչ բան որ բռնում է, իշխանուհու սրտով չի գալիս, փնթվում է. ա՛յս այսպէս չէ ո՛ւ, ա՛յս չի ընգունւած հասարակութեան մէջ, ա՛յս սազ չի գայ

ջահէլ աղջկան. ա՛յ, կը պսակեա, այն ժամանակ ինչ կ'ուզես արա, — լսում էր նա շատ անգամ իշխանուհուց և այդ պատճառով ամուսնութիւնը նրան վարդազոյն, հրապուրիչ էր երևում:

— Ննորհաւոր լինի, հոգիս, — աղաղակելով ներս ընկաւ նորա սենեակը Կատեան նշանախօսութիւնից մի քանի օր յետոյ: Ի՛նչ հիանալի մարդու հետ ես պսակելու. նա քեզ թագուհու պէս կը պահի, կը բախաւորացնի: Դու որ՝ բոլորովին արժանի ես այդ բախտին, Հեղինէ:

Հեղինէն երախտալից սրտով նայեց ընկերուհուն և սիրով համբուրեց նորան:

— Գիտեմ, Կատեա, որ դու ուրախ ես իմ բախտաւորութեանը: Ամիրանովի հետ վաղուց ես ծանօթ:

— Ի հարկէ. նա իմ մարդու ընկերն է:

— Մարդդ զեւ չի՞ եկել:

— Ձէ, նա մի ամսից շուտ չի վերադառնայ: Վաղը ես նրան կը գրեմ, ուրախութիւնից չի իմանայ ինչ անի: Գէորգը ինձ շատ անգամ է ասել. քո Հեղինէն հիանալի աղջիկ է, Աստուած նորան երջանիկ ապագայի արժանացնի:

— Ճիշտ է, — մտածում էր Հեղինէն նշանդրէքի նախընթաց օրը, — Նիկողայոսը ինձ զգուշացնում էր, որ առանց սիրելու չը պսակեմ, բայց միթէ՞ բարեկամութիւնը, ո՛չ, բարեկամութիւնից էլ զօրեղ համակրութիւնը՝ նոյնպիսի սուրբ զգացմունք չէ՞ և չի՞ փոխւում սէրի: Ամիրանովը շատ լաւ կողմեր ունի, խելօք է, զգայուն սրտի տէր, բայց նորանում մի ինչ-որ անըմբռնելի յատկութիւն կայ, որ ինչ անում եմ՝ չեմ կարողանում որոշել ու սահմանել: Ափսո՛ս Նիկողայոսը այստեղ չէ, նա շատ սուր դիտող է և անպատճառ իմ տարակուսանքս կը փարատէր: Բայց ի՞նչ տարօրինակ մարդ եմ ես, — ասաց նա, կարծես ուշքի գալով, և նորա պայծառ, սիրալիր հայեացքը կանգ առաւ նշանածի պատկերի վերայ... Քի՛չ բան կարող է անցնել լուրջ և ուսումնական ողջամարդու մոքովը, որ մեր, աղջիկների հասկացողութիւնից վեր է... շատ կարելի է, այն ժամանակ երբոր նորա երեսին յայտնւում է այն անըմբռնելի նշոյլը, նորա խելքը զբաղւած է լինում ազնիւ ու վսեմ մտածմունքներով... Այդպէս էլ պէտք է լինի անպատճառ, բոլոր փաստերը նորան նպաս-

տաւոր են, անցաւ Հեղինէի մտքովը և նորա դէմքը սկսեց աւելի և աւելի զւարթանալ: Մենք միասին կը պարապենք, կ'աշխատենք, նա կը լրացնի իմ կրթութիւնը, ընդհանուր ձգտումներով, զաղափարներով կը ոգևորենք, միթէ՞ այդքանը բաւական չէ որ ես նորան հոգով սրտով սիրեմ: Նա երէկ ինձ ասում էր, որ կեանքումը ոչ մի ժամանակ նորա սիրտը այնպիսի քաղցր ըրպէներ չի զգացել, ինչպէս ինձ հետ: Նա սիրում է խեղճ որբ աղջկան ամենաանշահասէր սիրով.— այսքան ժամանակ միթէ՞ մէկն ու մէկը ինձ վերայ նորա նման սաստիկ տպաւորութիւն գործել է: Սիրտս ինձ ասում է, որ քեզ հետ բախտաւոր կը լինեմ, Միքայէլ: Այսուհետեւ դու իմն ես: Մեծ է շնորհքդ, Աստուած, այսուհետեւ էլ ես ժենակ չեմ,— համարեա արտասանելով մտածում էր Հեղինէն, լի հաւատով և յոյսով գէպի լաւը, դէպի բարին:

Միւս աւաւօտը նա սովորականից դուրս ուրախ ու զւարթ դուրս եկաւ իւր սենեակից թէյ խմելու:

Մէկ—երկու շաբաթ անցած իշխան Նակունին շքեղ հարսանիք կատարեց: Բարի գնեցաւը ուրախութիւնից ոտների վերայ պար էր քալիս:

— Տե՛ս, հաւատարիմ եղիր մարդուդ, շատ կտրիճ տղայ է, սկի նման չէ այժմեան մեծամիտ լակոտներին,— ձանապարհ էր դնում նորան գնեցաւը:

Աստուած քեզ բախտի արժանացնի, աւելացրեց նա յուզւած ձայնով, օրհնելով նորան պսակից առաջ, և գրկեց:

Իշխանուհին լացակրկնած յայտնում էր նրան իւր սէրն ու գորովը և ասում էր բոլոր ծանօթներին, թէ ինքը անչափ ուրախ է տեսնելով իւր սրտի գուրգուրած փափագի կատարումը, այն է Հեղինէին իւր սրտի սիրած մարդուն տալը, և թէ յիմարութիւն է ժամանակի պահանջների դէմ վարելը:

(Կը շարունակւի)